



Jumat, 28 Juni 2024
Ogen: Hagai 2:20-23



"Kam Nggo Ku Pilih"



Pemilihan Dibata la pernah gagal; tapi pemilihan manusia banci saja gagal. Kalimat enda ningetken man banta maka otoritas Dibata la banci si ganggu gugat. Reh kata Tuhan man Hagai pedua kaliken, guna mpeseh berita arah Tuhan nari. Isi berita e me kerna kuasa si ate Tuhan icidakhenna nandangi bangsa Israel. "*Nandangi Kuugur me langit ras doni, janah Kuruntuhkan kerajaan-kerajaan ras kuasana. Kubenterken gereta perang ras kusirna; kuda mate kerina janah si ngersaksa sibunuh-bunuher*". I bas situasi sibagenda rupana, Tuhan tetap erkeleng ate lako nelamatkan dingeng milih Serubabel jadi suruh-suruhan Tuhan si erkuasa. Pemilihan Tuhan nandangi Serubabel ncidahkan otoritas Tuhan si erkuasa nandangi kegeluhen bangsaNa.

Kam nggo Ku pilih, enda me perkataan Tuhan man Serubabel, janah perkataan enda ka pe seh man banta moria. Perenungen man banta; kai nge erti pemilihan e nandangi dirinta? Kai nge ertina maka kita nggo i pilih Tuhan? Serubabel i pilih Tuhan guna majekken mulihi rumah pertoton si nggo runtuh asum bangsa Isarel i taban i Babel. Kita moria, kai nge sura-sura Dibata nandangi geluhta selaku moria? Dibata milih kita jadi anak-anakNa; Dibata milih kita jadi ndehara nandangi perbulangenta; Dibata milih kita jadi nande nandangi anak-anakta; Dibata milih kita jadi pengurus moria pusat, pengurus moria klasis, pengurus moria runggun, pengurus moria sektor; Dibata milih kita jadi pertua-diaken i tengah-tengah runggunnta; Dibata milih kita jadi wakil rakyat i bas daerahta masing-masing. Nina Tuhan man banta: "Kam nggo Ku pilih", kai jababta bekas pemilihan Tuhan e? tentunya sura-sura Tuhan i bas kita nggo ipilih eme lako maba kiniulin, keadilan, perubahen rikut pe kemalemen ate i tengah-tengah lingkungan ija kita nggo i pilih Tuhan. Pakekenlah pemilihan Tuhan e alu tetap erkemalangen man baNa.

"Nina Tuhan, kam nggo Ku pilih., uga ninta!!!"